

Qu'il avoec les anges entent.
Que vous puis je plus recenser?
Il a quanque l'en puet penser :
C'est uns petiz mondes novviaus —
Cist me fait pis que nus louviaus!
Sanz faille, de l'entendement

19060 Connois je bien que vraiment
Celui ne li donné je mie :
La ne s'estent pas ma baillie,
Ne fui pas sage ne poissant
De faire rien si connoissant.
Onques ne fis riens pardurable :
Quanque je faz est corrompable.
Platon meïsmes le tesmoingne
Quant il parle de ma besoingne
Et des dieus qui de mort n'ont garde.

19070 Leur createurs, ce dist, les garde
Et soustient pardurablement
Par son vouloir tant seulement ;
Et se cil vouloirs nes tenist
Trestouz morir les couvenist.
Mi fait, ce dist, sont tuit soluble,
Tant ai pooir povre et obnuble
Au regart de la grant poissance
Du dieu qui voit en sa presance
La trible temporalité

19080 Souz .i. moment d'eternité.
C'est li rois, c'est li emperereres
Qui dist as dieus qu'il est leur peres ;
Ce sevent cil qui platon lisent,
Car les paroles tels i gisent
— Au moins en est la sentance
Selonc le langage de france :
« Dieus des dieus, dont je sui formierres,
Vostre peres, vostre crierres,
Et vous estes mes creatures
19090 Et mes oevres et mes faitures,

Par nature estes corrompable
Par ma volenté pardurable.]
Car ja riens n'iert fait par nature,
Combien qu'ele i mete grant cure,
Qui ne faille en quelque saison.
Mais quanque par bonne raison
Veult dieus conjoindre et atranper,
Forz et bons et sages sanz per,
Ja ne voudra ne n'a vullu
19100 Que ce soit jamais dissollu ;
Ja n'i voudra corrupcion.
Dont je faz tel conclusion :
Puis que vous commançastes estre
Par la volenté vostre mestre
Dont fait estes et engendré,
Par coi je vous tieng et tendré,
N'estes de mortalité
Ne de corrupcion quité
Du tout, que je ne vous veïsse
19110 Morir se je ne vous tenisse.
Par nature morir porroiz,
Mais par mon vueill ja ne morroiz,
Car mes vouloirs a seignorie
Seur les liens de vostre vie
Qui les composicions tiennent
Dont pardurabletez vous vienent. »
C'est la sentence de la lettre
Que platon vost ou livre mettre,
Qui mieus de dieu parler osa,
19120 Plus le pris, plus l'alosa
C'onques ne fist nus terriens
Des philosophes anciens.
Si n'en pot il pas assez dire
Car il ne peüst pas souffire
A bien parfaitement entendre
Ce c'onques riens ne pot comprendre
Fors le ventre d'une pucele.

1050
Jean de Meun
Mais, sanz faille, il est voirs que cele
A cui li ventres en tendi,
19130 Plus que platon en entendi,
Car ele sot des qu'ele portoit
Dont au porter se confortoit,
Qu'il ert l'espere merveillable
Qui ne puet estre terminable,
Qui par tous lieus son centre lance
Ne leu n'a la circonférance ;
Qu'il ert li merveilleus triangles
Dont l'unité fait les .iiij. angles
Ne li .iiij. tout entierement
19140 Ne font que l'un tant seulement.
C'est li cercles trianguliers,
C'est li triangles circuliers
Qui en la virge s'ostela.
N'en sot pas platon jusques la,
Ne vit pas la trible unité
En ceste simple trinité
Ne la deïté souveraine
Affublee de pel humaine.]

C'est dieus, qui createur se nomme :
19150 Cil fist l'entendement de l'homme
Et en faisant le li donna ;
Et cil si li guerredonna,
Comme mauvais, au dire voir,
Qu'il cuida puis dieu decevoir !
Mais il meïsmes se deçut,
Dont mi sires la mort reçut
Quant il sanz moi prist char humaine
Pour le chaitif oster de paine.
Sanz moi, car je ne sai commant,
19160 Fors qu'il puet tout par son commant.
Ainz fui trop forment esbahie
Quant il de la virge marie
Fu pour le chaitif encharnez,
Et puis penduz tout encharnez